

սեբարե: Ամա նասըլ էլա սեբարե թոքսեվրի՛ս, պեգէ մը Աշոտին տալով, պաչիկ մըն ալ իր ֆիանսեին: Զսանըբէստե հոգի մէջ մտան: Թովրատի սա վա պարտե: Օն վա ըիկոլէ: Էբէյի տեսնալիք բան կայ: Ա՛հ, լուլուտաքիմու, քէլ պապիլոն, քէլ չորպա, էքէլ խայտառակութիւն:

Ահա այսպէս յունարէնը միշտ իր լեզուին վրան է, թրքերէնը իր լեզուին տակն է, ֆրանսերէնը իր լեզուին ետեւն է, իսկ հայերէն լեզուն ալ իր լեզուին ծայրն է: Եւ ահա թէ ի՛նչու լեզուն երկար է այս բազմալեզուեանին:

Ան գիտե վարը նստիլ ու վերէն նայիլ: Գիտե վարը պառկիլ ու վերէն խռկալ: Վարը ուտել, վերը կշտանալ: Վարը աշխատիլ ու վերը հանգչիլ:

Չենք կրնար սակայն ըսել, որ այս ինքնահաւանը բան մը չգտաւ իր գաւառացի եղբայրներուն մէջ: Այդ մեղքը չենք գործեր, քանի որ Չմիւռնահայը մէկուն մէջ գտաւ էշ մը, ուրիշին մէջ՝ գոմէշ մը, երրորդի մը մէջ՝ խոզ մը, չորրորդի մը մէջ՝ ջորի մը, հինգերորդի մը մէջ՝ գայլ մը ու վեցերորդի մը մէջ՝ գազան մը:

Կարծես հայութիւնը կենդանաբանական պարտեզ մը եղած ըլլար ու ինք ալ՝ օտար զբօսաշրջիկ մը:

Ու չհաւնեցաւ այդ կենդանաբանական պարտեզին ալ:

Չենք կրնար սակայն ըսել, որ բնաւ բանի մը չէ հաւնած Իզմիրցին:

Ան միշտ մէկ բանի շատ է հաւնած՝ իր դրացիին կնկանը:

Իր դրացին ալ թերի չէ գտնուած: Ու այսպէս՝ բարեբարի եւ ոսկեզօծ դրացնութեան տեսիլներ անպակաս են եղած:

Իզմիրցին, տօնական առիթով, իր կնոջը կ'ըսէ.

-Գոհարս, քեզի ծաղիկ բերի:

Իսկ իր դրացիին կամ սիրուհիին կ'ըսէ.

-Ծաղիկս, քեզի գոհար բերի:

Յետոյ անպատճառ եկեղեցի կը փութայ ու Աստուածամօրը կ'ըսէ.